

9. oktober 2019

UKA2019/72

**Kalaallit Nunaanni Piartortut najugaqarfissaannik Naalakkersuisut pilersitsinissaq anguniarlugu suliaqarnissamik peqquneqarnissaannik Inatsisartut aalajangiiffigisassaattut siunnersuut.**  
(Inatsisartunut ilaasortaq Jens Napätôk', Partii Naleraq)

Kalaallit Nunaanni piartortut najugaqarfissaannik pilersitsinissaq anguniarlugu Jens Napätôk' partii Naleraq siunnersuutaanut Siumumiik imaattumik oqaaseqaateqassaagut.

Nunatsinni napparsimasunut katsorsarneqarsinnaanngitsunut paaqutaqarfimmik (hospice) pisariaqartitsisoqarneranik Naalakkersuisut misissueqqullugit peqquneqarnissaannik Inatsisartut aalajangiiffigisassaattut siunnersuummik 2012 Inatsisartut ukiakkut ataatsimiinneranni Siumumiik saqqummiussaarpugut. Siunnersuutip taassuma malitsigaa, 2014-imi aammalu 2015-imi nassuiaammik Naalakkersuisut saqqummiussaqaarnerat.

Qulequtaq tamanna 2012-mi Siumumiik saqqummiukkatsigu tupinnanngitsumik nunaqqatitsinnit assigiinngitsumik qisuariarfigineqarpoq, ilaasa anguniagaq paasilluarlugu tapersersorpaat ilaasalu nunanik allanik ilaarsinerinnartut nalilerlugu. Taamanikkulli partiit ilai isumaqarput hospicemik tassa piartortut najugaqarfissaannik pilersitsisoqassappat nunatsinni peqqinnissaqarfiiit naligiimmik pineqartariaqartut imatut paasillugu Nuummi hospiceqassappat piartortut najugaqarfissaannik taava aamma sinerissami peqqissaaviit sinneri tamarmik peqartariaqartut.

Piartortut pillugit Mikaela Augustussen Ph.d -mik soraarummeeruteqarnikuuvoq, tassani sammineqarput piartortut, ilaqutaasut sulisullu pisariaqartitaat suunersut.

Ph.d allaaserisami piartortut aaliangersimasumik saaffissaqarnissaq pisariaqartippaat assersuutiginnarlugu nerisaqarnermut, anartarnermut allanullu tunngasut pillugit apeqqutissaqarunik saaffigisinnaasamik. Nunarput isorartoorujussuuvoq piartortullu annertuumik angalasariaqartarput nunatta iluani aammalu nunatta avataanut. Taamaattumik peqqissaaviit sinerissamiittut suleqatigiilluarnissaat pingaarutilerujussuuvoq, qularnanngilarlu kosmek atuutilerneratigut attaveqatigiinneq sinerissami pitsaanerulersimassasoq. Siumumiilli ilisimavarput nunatta Danmarkillu akornanni qarasaasiakkut attaveqatigiinneq kosmek eqqarsaatigalugu ajornartorsiutaasoq, kingunerisaanik paasissutissat pingaarutillit nunatsinni peqqissaavinnut anngutinngitsoorsinnaasarpur napparsimasumullu kingunerlussinnaasarlutik taamaattumik Siumumiik soqutigivarput paasissallugu ajornartorsiut tamanna iluarsiiqqineqarsimanersoq tassami pingaarnerpaaq tassaamat napparsimasup peqqinnissaqarfimmiik sullilluarneqarnissaa.

Ph.d -mi allaaserisami ilanngullugit ilaqutaasut tikinneqarput taakkuttaaq aaliangersimasumik attaveqaateqarnissaq ujartorpaat.

Allaaserisami pingaarutilik tikinneqartoq alla tassaavoq sulisut piartortunut sullissisut. Taakkua nunaqarfinni illoqarfinnilu minnerusuneersut kissaatigaat imaajarneqartarnissartik.

Tamakkua annikitsunnguungaluit aningaasarpassuarnik naleqartariaqanngitsut piartortunut, ilaqutaasunut sulisunullu annertuumik isumaqarlutillu iluaqutaasinnaapput.

Siunertaq tassalu piartortunut najugaqarfiliornissaq isuma immini pitsaasuvoq pitsaanerpaassallunili najugaqarfik peqqinnissaqarfiup avataaniippat. Tassani hospice iluani siunertaavoq piartortup pitsaanerpaamik sullinneqarnissaa, inuk qitiutillugu pisariaqartitaanik tamanik ikiorneqarnissaa. Tamanna aatsaat piviusunngorsinnaavoq piartortunut najugaqarfik namminerisamik sulisoqarpat.

Siunnersuut nalilersoqqissaagassanngorlugu ataatsimiititaliami susassaqartumi oqaluuserilluarneqarnissaa innersuupparput.

Karl-Kristian Kruse, Siumut